



餛仔店

親像一隻忠實的狗仔
恬恬仔跔(khû)佇(tī)菜市仔邊

早起

伊慢慢共目睷擘(peh)金

市場燈火也清醒

伊的喙開開

人客佇伊腹肚裡(--lí)來來去去

買鹽

買米

買油

叮叮咚咚

銀角仔共伊飼甲膨皮膨皮

人聲吵吵鬧鬧

伊感覺規身軀的血流甲足緊

四十年後

超級市場

便利商店

家樂福

親像病毒侵入這片土地

市場

一工一工無尾

燈火

一日一日暗淡

人客毋知佗位去

我看著阿媽吐一个大氣

摸伊瘦瘦的身軀

伊也是恬恬仔跔佇市場邊

親像一隻忠實的狗仔

只是

伊的目睷

已經無法度擘金

創作理念

我的阿媽佇麗都菜市場內底開一間餛仔店。以前，菜市仔人足多，過年過節，餛仔店的生意攏足好。時代咧變，tsit-má，餛仔店的生意一冬比一冬閣較糗，定定聽阿媽講起餛仔店以前的故事。我著想講，欲用詩的語言，共這間餛仔店的興衰紀錄起來。

楊佩文

國立成功大學台灣文學系

